

四庫全書

史部

欽定四庫全書

平定準噶爾方略正編卷二十六

乾隆二十一年春三月庚辰

命陝甘兩省滿洲各營借墊銀兩分年扣還

上諭大學士曰陝甘兩省辦理軍需以來所有駐防
滿營辦解馬匹及裹帶料草等項頗多借墊例應
於餉銀內扣還但念陝甘上年收成歉薄糧價未
免稍昂各兵應領糧餉若一時抵扣生計必多拮

据伊等趨事急公宜加優卹著西安寧夏涼莊各將軍將該營借墊數目核實奏聞准其暫借司庫銀兩先行彌補分作三年扣還歸欵以紓兵力

諭陝甘總督黃廷桂辦理瓜州回民事宜

上諭軍機大臣曰據黃廷桂奏吐魯番地方並無蒙古居住瓜州回民各願遷回並稱向與準噶爾交納方物即作每年貢賦等語瓜州回民遷回吐魯番一事前已降旨俟策楞兆惠於軍務凱旋之便

先將吐魯番地方情形會同查勘定議辦理今雖
據額敏和卓繪圖呈覽著傳諭黃廷桂仍遵前旨
曉諭回民今年仍令暫住瓜州俟策楞等查勘後
再為辦理至伊等進貢方物若原係噶爾丹策零
之人今伊犁既定自應充作貢賦如係噶爾藏多
爾濟及巴雅爾等所屬此番遷回故土應仍歸伊
等管轄方為允協統俟查勘後妥辦

命授侍衛丹津為散秩大臣赴察哈爾游牧

上諭軍機大臣曰侍衛丹津此次辦理訥默庫之事甚屬出力著加恩授為散秩大臣賞銀一百兩歸於察哈爾正藍旗安置仍交該總管照從前安置厄魯特之例賞給產業牲隻其牲隻未滋生之前並賞給口糧一年至丹津所屬戶口及歸併居住之兄弟等並著阿蘭泰等查出同此次賞給訥默庫之二十戶人等一并送至察哈爾安插

壬午

諭定邊左副將軍哈達哈等辦理烏梁海事宜

上諭軍機大臣曰據哈達哈等奏詢問德善遣往哈薩克中途為烏梁海等阻止退回各情節伊言語支吾不能指出實情等語從前德善聞烏梁海等謠言不察虛實即行退回朕即知其怯懦無能是以將伊革職自備資斧仍隨順德訥前往哈薩克効力贖罪今觀此奏則烏梁海等原不敢遽萌阻止之念特因德善退縮不前伊等始得逞其無稽

之談德善即甘受其欺給遽行退回如果烏梁海等敢於阻止何以遵檄即辦給馬匹口糧且德善果奮勉前往即伊等有意阻止亦斷不為所惑也前已令青衮雜卜策布登扎布等領兵前往辦理烏梁海等著即行諭知將起意阻止德善之人查明從重治罪其餘並著寬免此等烏梁海原屬無知不過使知所警懼足矣再宰桑固木扎卜亦係遣往哈薩克之人伊遵噶爾藏多爾濟所諭令所

屬烏梁海等將應行交納一年稅賦辦給馬匹以
為遣往哈薩克之用於此見噶爾藏多爾濟誠心
籌辦實屬可嘉今因德善中途退回與固木扎卜
無涉且現已另派侍衛順德訥前往無庸固木扎
卜與之同行著即由彼處遣回游牧傳旨獎諭噶
爾藏多爾濟其所屬烏梁海等應納稅賦仍著噶
爾藏多爾濟收取

參贊大臣達爾黨阿疏奏遣送回人總管阿底

斯等前往伊犁事宜

達爾黨阿奏言前據參贊大臣兆惠等將回人
總管阿底斯侍衛岳蘇卜阿卜都喇伊木等送
至軍營現在已至臣駐劄處查伊犁回人俱係
阿底斯戚屬宜遣往將軍策楞處令其招降回
衆是以即於二月十六日起程前往又從前侍
衛第瑪帶領前來之厄魯特公塞卜騰等亦應
遣赴將軍策楞處或令仍回游牧或令隨營行

走今亦陸續前來一併令其前赴策楞軍營惟
散秩大臣齊巴克係塔本集賽大宰桑暫留臣
營辦事奏入報

聞

都爾伯特台吉伯勒克卒

命伯勒克之子多底巴承襲都爾伯特扎薩克一等

台吉

癸未

命授收楞額錫喇為藍翎侍衛

上諭軍機大臣曰策楞等查出擒拏宰桑察衮係哈薩克錫喇之收楞額沙喇具奏請旨錫喇拏獲賊人奮勇効力著加恩授為藍翎侍衛賞銀五十兩命授訥默庫宰桑察罕鼐濟等為三等待衛

上諭軍機大臣曰阿蘭泰等將訥默庫妻子及宰桑護衛等解送來京著交部分別辦理其宰桑察罕鼐濟巴圖濟爾噶爾等將訥默庫背叛情形據實

陳奏著免其治罪加恩授為三等侍衛至訥默庫
現在新娶之妻亦不必治罪著舒明查明係何部
落所屬即行發還交與管轄

甲申

諭陝甘總督黃廷桂拏問薩喇爾

定西將軍策楞奏言據侍衛巴寧阿等自伊犁
回至軍營告稱上年隨將軍等駐劄伊犁八月
二十三日間賊人搶掠臺站將軍班第等由固

勒扎地方向空格斯迎出賊兵追至薩喇爾即
欲奔逃參贊大臣鄂容安云賊來當戰何以急
走薩喇爾答以爾何所知遂策馬而行喀爾喀
察哈爾等俱隨之而去將軍處止餘司員侍衛
及兵丁等六十人是夜賊益叢聚將軍等遂各
自盡我與員外郎柏琨等自刎復魁宰桑巴桑
遣人將我等俱行擄住看守後又送往伊犁喇
嘛處居住至十月內喇嘛宰桑等高同薩喇爾

擒賊贖罪始將我等釋放給與口糧適阿睦爾
撒納又將喇嘛等遷住遠處欲將我等帶住我
回佛保拴住潛行逃出等語奏入

上諭軍機大臣曰策楞奏稱詢據自伊犁回至軍營
之侍衛巴寧阿等供稱伊犁擾亂時薩喇爾見賊
兵追及率衆先奔班第等勢不能支旋即自盡等
語薩喇爾與班第等同為將軍自當奮力禦賊果
至勢窮力絀班第等先以身殉薩喇爾或不得已

衝突而出不識死綏之義尚無足責乃竟首先奔竄以致大衆潰敗是二臣雖死於賊而薩喇爾亦不能無罪但係巴寧阿等一面之詞應將薩喇爾解京質對著傳諭黃廷桂俟薩喇爾到肅州時即行鎖拏慎選幹員速行押解來京

定西將軍策楞等疏奏領兵追襲阿逆情形

策楞等奏言臣等領兵至博羅布爾噶蘇地方距伊犁甚近正當會合兵力迅速前往今聞阿

逆自洪郭爾鄂博帶兵往烏哈爾里克往擊諾爾布臣等若由博羅布爾噶蘇大路前進路雖平曠恐逆賊易於知覺潛身逃竄是以仍從山內間道行走向烏哈爾里克往襲使賊猝不及防仍一面遣人至諾爾布處及附近之台吉宰桑等處通信協擊奏入

上諭軍機大臣曰據策楞奏領兵至博羅布爾噶蘇與賊人相距甚近等語此時即宜會同玉保等奮

力擒拏使賊不至聞風逃竄方為合宜朕意伊等
所聞阿逆帶兵往擊諾爾布之言俱不可信或借
此為名向洪郭爾鄂博等處逃遁亦未可定此旨
到彼量策楞等自已擒獲逆賊設從別路遁出策
楞等仍遵節次所降諭旨無論逃往何地務期弋
獲不得稍存退諉朕於此事亦斷不肯草率完結
策楞等其慎之

乙酉

命侍郎兆惠傳諭達什達瓦部落人衆

上諭軍機大臣曰薩喇爾現已降旨拏問俟到京時
審訊治罪著傳諭兆惠俟伊犁事竣後回至巴里
坤將拏問薩喇爾之處明白曉諭達什達瓦之妻
及薩喇爾之兄布林等知悉仍諭布林罪由薩喇
爾一人與伊無涉毋庸疑懼薩喇爾子弟等若尚
未送至察哈爾地方即留於達什達瓦部落內管
轄如已至中途即令解送來京並將薩喇爾在伊

犁帶回之牲隻物件俱行查出奏聞請旨再薩喇爾自伊犁帶來達什達瓦之子布庫現在巴里坤並著兆惠向達什達瓦之妻曉諭伊等從前投誠時並未言達什達瓦尚有子嗣即鄂齊爾布林等至京亦未奏及其中不無可疑伊等或聽從薩喇爾一人之言附和朦混不可不究問明白令將實情供出奏聞後再行酌量辦理

丁亥

定西將軍策楞等疏奏大兵前進伊犁情形

策楞等奏言二月二十四日大兵至伊犁固勒
扎之濟爾哈朗地方有溫都遜拉藏大喇嘛楚
里木額林沁遣伊什吹木丕勒尼爾巴車凌吹
木丕勒等前來迎接稟稱阿睦爾撒納數次遣
人傳喚我等我等未經前去今聞大兵已至情
願投誠等語臣等隨向喇嘛等宣諭

聖旨此番大兵擒拏阿逆特因阿逆擾害爾等阿逆

一日不獲則羣生一日不安今阿逆雖向察罕
烏蘇地方逃竄大兵立即追拏俟擒獲時必當
善為籌辦使爾等永獲安生仍令喇嘛等善自
約束各安生理奏入

上諭軍機大臣曰策楞等領兵雖至伊犁而阿逆業
已逃竄此時所有伊犁應辦事宜尚可稍緩惟當
追擒逆賊為第一要務阿逆詭詐百端策楞等屢
次誤聽傳言以致首惡兔脫現在策楞等皆云阿

逆逃入哈薩克境內以朕思之阿逆現與額林沁
同逃額林沁殺掠哈薩克積有仇隙斷無前往之
理况阿逆現領兵三千餘似此大隊兵丁哈薩克
必不能容留此又係阿逆詭計揚言逃往哈薩克
俟我兵往追伊或轉從別路擄掠臺站或仍至博
羅塔拉塔爾巴噶台等處棲身皆屬未定策楞等
務須偵探確實萬勿再為所愚如果逃入哈薩克
則仍遵前旨派達爾黨阿等領兵索取務期擒獻

又如阿巴噶斯哈丹等大兵至伊等游牧時伊等已逃回阿逆處同行今伊犁地方又不聞伊等蹤跡此時恐又回至伊游牧收拾殘衆或尾出大兵之後前來抵敵或向額林哈畢爾噶等處肆行騷擾此皆不可不豫為防範者從前達爾黨阿曾奏帶兵至安濟哈雅地方直抵伊犁兆惠亦奏稱前往特訥格爾察看情形再行前進今既須分路堵禦達爾黨阿不必前赴伊犁即駐劄安濟哈雅確

探阿巴噶斯等蹤跡速行辦理並著策楞派出熟悉地方情形如尼瑪哈薩克錫喇等一人協同達爾黨阿籌辦兆惠至特訥格爾後亦暫止前進或與達爾黨阿會合一處或另至緊要處所聲援策應其北路哈達哈等亦降旨令伊等帶兵協擊策楞等務互相通信聯絡聲勢以期弋獲至奏稱詢問阿逆處逃出之人告稱敦多克曼集德濟特等俱欲擒獻阿逆現已遣人前往等語此語必不可

信敦多克曼集等與賊聯為一氣交結甚深馬肯
即為擒獻其為詭計無疑而策楞等即信以為真
遣人前往無怪乎其屢次被敗而不自覺也即阿
逆現帶兵三千之說亦係詭言聲張伊兩次被回
人擊敗烏合之衆量已無多如果兵力尚盛何以
一見大兵即行逃竄竟不敢稍為抗拒此亦不能
無疑者朕所指示乃揣度形勢而言若策楞等身
在彼處更應確有所見且厄爾錫音哈薩克錫喇

尼瑪吞圖布等俱係熟悉彼處情形之人策楞等務宜公同籌酌計出萬全但期適合機宜亦毋庸拘泥朕旨至塔本集賽人等前已附和阿逆此時阿逆若仍至博羅塔拉塔爾巴噶台等處應將此等人先行辦理不許仍蹈前轍或遷至伊犁安插其伊犁衆喇嘛等反覆無常必須從重辦理方知儆戒俟擒獲阿逆後策楞等酌量擒拏懲治命定邊左副將軍哈達哈等領兵協拏阿逆

上諭軍機大臣曰策楞等分路擒拏阿逆事宜已詳
悉降旨令伊等遵照辦理其北路哈達哈等所領
兵丁現在往辦烏梁海事務著傳諭哈達哈伊原
係副將軍所有同往之青滾雜卜策布登扎布並
著授為叅贊大臣并將扎木禪察達克二人帶往
俟辦理烏梁海事竣即在彼處候旨或策楞處寄
信到時阿逆如逃往博羅塔拉等處即領兵由彼
處進發協同擒拏若逃入哈薩克境內亦帶兵至

哈薩克邊界駐兵遣人索取務令其速行擒獻其
烏梁海等阻止德善前往哈薩克之處必係聽阿
逆指使務確取實情即行奏聞

戊子

諭駐劄巴里坤辦事大臣和起等辦理達什達瓦屬
人游牧事宜

上諭軍機大臣曰前命兆惠俟伊犁事竣即回至巴
里坤辦理達什達瓦屬人事務今兆惠現有應辦

事宜未能即回巴里坤所有達什達瓦屬人游牧從前原議於今歲遷至阿爾台地方今伊等屬人現在派出從征俟撤兵後再令遷移著和起等轉行曉諭達什達瓦之妻知悉此時伊屬人等應行賞給口糧仍行賞給

命駐劄烏里雅蘇台辦事大臣阿蘭泰等領兵防守
布延岡地方

上諭軍機大臣曰哈達哈等現在領兵辦理烏梁海

布延圖地方一應防守事宜甚屬緊要烏里雅蘇
台軍營現有普慶駐劄著阿蘭泰舒明等攜印前
往布延圖駐劄防守其都爾伯特游牧事務著賞
給郎中巴蘭泰副都統職銜前往辦理

庚寅

定西將軍策楞等疏奏分派官兵擒賊事宜
策楞等奏言據叅贊大臣玉保咨稱二月二十
六日至烏哈爾里克地方據諾爾布稟報阿睦

爾撒納向和洛霍漸前行帶兵三千餘由諾爾
布游牧經過察其情形似向哈薩克逃竄我兵
力單弱未敢交戰專候大兵前來等語臣等詳
思阿逆斷無三千兵丁之數不過烏合之衆若
乘勢攻擊何難立時潰敗乃諾爾布遷延觀望
明係有心退縮今玉保等已領兵連夜追逐復
派烏爾登扎那噶爾布等接續前往臣哈薩克
錫喇見諾爾布觀望不前即揀選精兵五十名

前往督同効力臣策楞等亦統領大兵即速進
發務期擒獲逆賊奏入

上諭軍機大臣曰策楞等屢次奏報擒拏阿賊情形
大約勉強前進總無計出萬全必期弋獲之意此
次伊等分兵追逐而哈薩克錫喇間諾爾布之信
奮勇前往督同効力看來尚能成事然策楞等於
哈薩克錫喇尼瑪吞圖布等數人正宜善為撫馭
使之感激効命若加以督責致失衆心則於事更

為無益至阿逆蹤跡雖似逃往哈薩克或仍至博
羅塔拉塔爾巴噶台等處潛行騷擾其種種詭譎
伎倆昨已詳悉指示策楞等務宜加意偵探勿專
聽傳聞之言以致顧此失彼方為妥協現在阿逆
雖經逃竄必遣人潛赴軍營探信或留於伊犁地
方皆當密加察訪如拏獲此等人詢明情節即行
正法再自上年進兵以來從無滋擾各部落游牧
之處伊等自必知恩今大兵駐劄日久牲隻口糧

俱資接濟若將帶往茶葉銀兩向各部落等互相
交易自必樂從如有違諭即行換易及沿途協助
馬匹口糧者一一登記俟事竣後酌量加恩倘稍
有勉強或故將疲瘦牲畜交易者其人即屬可疑
應留心辦理收取其牲畜馬匹以增兵力一切與
哈薩克錫喇等斟酌辦理

辛卯

命授烏梁海總管圖布慎為散秩大臣

上諭軍機大臣曰圖布慎從前辦理烏梁海時甚屬出力且將馬匹牲隻供給大兵著加恩授為散秩大臣伊係熟悉烏梁海情形之人哈達哈等此時領兵辦理烏梁海著將圖布慎帶領前往

壬辰

定西將軍策楞等疏奏領兵移駐固勒扎情形策楞等奏言臣哈薩克錫喇於二月二十七日帶兵至伯勒齊爾地方會同諾爾布追緝逆賊

行至喀喇烏蘇見額林沁據險結壘公同商議
若先攻取額林沁未免兵力稍分稽遲時日反
令賊渠遠遁因遣人招降額林沁明噶特舍楞
阿喇木扎木巴等伊等俱已歸降正在派兵前
進是夜有布庫努特一名自阿逆處逃出告稱
阿睦爾撒納一面率衆擒拏敦多克曼集一面
輕騎遁走等語現在臣玉保尼瑪扎那噶爾布
烏爾登及衆台吉宰桑等選精兵一千名迅速

追逐前往並據玉保等咨稱現在阿逆勢力已窮即日就擒所有大隊兵丁毋庸續發等語臣等詳思阿逆雖已逃竄玉保瑪尼及衆台吉等輕騎掩襲斷不致於漏網今伊犁已定其應收集流亡撫慰各喇嘛以及安插失業貧人等事俱須經理臣等即將大兵移至固勒扎居住奏入

上諭軍機大臣曰策楞等奏稱玉保等現在將次追

及阿逆伊即領兵回至固勒扎等語策楞等錯謬
已極阿逆即已力窮毋庸大兵深入伊等應分隊
往追何必急急回至固勒扎此實朕所不解且摺
內並未將玉保等相距阿逆遠近之處及阿逆究
向何處逃遁一一聲明而僅以收服一額林沁為
足了事是全不識事之輕重且伊等從前誤信福
昭等擊獲阿逆之言即將巴里坤解送馬駝檄行停
止以致軍行遲緩今又將布庫努特一小人所

告之言信以為實焉知又非阿逆從中肆其詭詐
緩我大兵之計策楞等一誤再誤必致阿逆遠颺
伊等束手無措而已其回至固勒扎君云撫定伊
犁則伊犁自昨歲已經平定所有無業窮民亦伊
等附和賊人自取窮困何必急於料理且厄爾錐
音現在即至彼處儘可交與辦理豈必待策楞親
同籌畫如因兵丁馬力平常則現在既無庸大兵
深入即揀選馬匹酌帶二三百名前往未始不可

策楞即欲撤回亦應派扎拉豐阿在彼策應伊等
領兵前往所為何事今阿逆尚未就擒即已撤兵
又安用此將軍叅贊為耶看今日情形則阿逆必
已竄入哈薩克境內策楞等務遵朕節次所降諭
旨派達爾黨阿玉保尼瑪等迅速前往哈薩克邊
境索取毋得少生退諉並曉諭伊犁台吉宰桑等
伊等受阿逆暴虐今雖脫逃仍不得安然無事大
兵一撤伊必前來滋擾責令伊等協助大兵窮追

極捕以絕根株方為一勞永逸之計其北路哈達
哈等協力擒拏之處昨已詳悉傳諭此時阿逆若
逃入哈薩克中途或搶掠新收之烏梁海等或煽
誘鄂木布等將察達克等游牧騷擾均未可定哈
達哈務於逆賊未到之先即將烏梁海鄂木布等
悉行擒治以杜後患事竣即遵旨帶兵往哈薩克
地方索取阿逆再從前遣德善往諭哈薩克中途
退回實屬怯懦若此時阿逆果逃入哈薩克地方

著哈達哈即將德善在軍營正法以為畏蕙儆事
者戒

臣等謹案阿逆甫經鼠竄意料大兵未及即
行進勦本無隄備且其時衆心瓦解羽翼方
殘勢力不能自振將軍等果能及時掩襲何
異釜魚幕燕乃屢為傳言所惑以致逆孽稽
誅苟延殘息然當軍書初達

皇上神明洞照屢蒙

訓旨切責一一預操符券第事會所乘間不容髮軍

郵雖速不能不需旬日之期此在事諸臣不

克稟承之咎固已百喙難辭及伏讀

訓諭中外

明旨迭頒猶以失之意外與失之意中為諸臣

諄切剖示是不獨足以折服諸臣之心尤可見

聖主料敵如神司行陣者設皆節節赴窾其勢有不

捷如摧枯拉朽者哉

甲午

諭定西將軍策楞等防範阿逆事宜

上諭軍機大臣曰從前阿逆宰桑阿睦爾濟爾噶爾
告稱阿逆與伯什阿噶什交結甚深今伯什阿噶
什雖有與諾爾布同來之語尚未知在何處阿逆
或約同前往哈薩克亦未可定策楞等應詳加探
訪如阿逆前往伯什阿噶什處即遣人曉以利害
令其擒獻奏聞加恩倘有隱匿縱放之事即將伯

什阿噶什擒拏治罪再阿逆至哈薩克後必煽誘
哈薩克人等騷擾各游牧地方現在塔本集賽宰
桑達什策凌噶勒雜特宰桑都噶爾等投往北路
已降旨令伊等於阿爾台附近地方安置其哈薩
克接壤之集賽及鄂拓克等俱應豫為防範或遷
至伊犁安插方為妥協策楞等即遵旨辦理

丙申

定西將軍策楞等疏奏阿逆窮竄情形

策楞等奏言據藍翎達永阿自阿逆處脫出告稱阿睦爾撒納搶掠喇嘛不敢與大兵抗拒此時非逃往哈薩克即奔竄布魯特而賊衆觀望又俱不願往哈薩克無不深恨切齒衆心離散等語復據扎薩克鄂諾錫帶同自阿逆處逃出之鄂勒錐圖前來告稱被阿睦爾撒納搶擄游牧之後隨伊等至和洛霍澌地方正值哨探大兵與諾爾布等會合占據津梁阿睦爾撒納不

能渡河僅依沙岡自守大兵即於二十八日追
及並從前所調卓托魯克巴爾達穆特霍勒博
斯多果魯特等四鄂拓克兵五六百名亦與大
兵會齊額林沁舍楞等台吉大兵一到即行投
誠即察罕圖克人等亦聞其私相計議因伊妻
子皆在內地斷不肯逃向哈薩克等語又據厄
爾錐音處寄信之庫克並藍翎侍衛愛斯泰及
都爾格齊哈什哈等前來告稱內大臣厄爾錐

音途次聞福昭所報之信未確急赴烏魯特克
勒特聚集兵丁將察哈什誘擒解送京師厄爾
錫音現帶兵四千名前進其所帶之兵已抵濟
爾哈朗地方等語奏入得

旨下部知之

丁酉

訓飭定西將軍策楞等

上諭軍機大臣曰覽策楞等數次摺奏不過詳言伊

犁厄魯特等流離困厄情形至如何擒縛阿逆之處反不置一詞伊等之意若以伊犁既得則追捕阿逆之事不甚緊要不知此見甚屬錯謬伊犁乃一空曠之地並無城垣駐兵與否無甚關係即為窮乏之人料理生計不過於擒獲阿逆後或將伊等移近內地過一二年令其耕種自給或於瀕河近山之處令其捕魚打牲為業俱屬可行今策楞等雖將伊等困厄情形陳奏其如何酌量措辦之

處總未籌及是何意見且伊等所以窮困若此者
非我使之均由誤聽阿逆之言互相劫掠自貽伊
戚策楞即應將此緣由曉諭伊等鼓勵衆心尅期
擒賊俟阿逆擒獲時再為籌辦生計未始不可若
再傳諭策楞等其如何設法追捕壯我軍威不致
漏網之處俱遵節次諭旨悉心籌畫務合機宜以
期迅速竣事

夏四月戊戌朔

諭定西將軍策楞等領兵前往哈薩克事宜

上諭軍機大臣曰覽策楞等所奏阿逆果已逃竄朕
早料伊等不能擒獲必致遷延逃避伊等尚何顏
更為陳奏聞登努勒台地方水草充足牧放甚宜
著策楞等領兵赴彼處駐劄俟一月後選集兵丁
遵朕前旨交與達爾黨阿等前往哈薩克辦理如
先遣人往諭則非僅委派一偏裨可辦即著玉保
同恩克博羅特選索倫兵五六十名先行傳諭仍

派兵一二千名隨後繼進王保係專任追捕阿逆
之人乃並不親行僅令烏爾登等前往以致逆賊
免脫此次前赴哈薩克若仍不知奮勉斷不姑貸
命陝甘總督黃廷桂赴巴里坤辦理事務

上諭軍機大臣曰策楞等不能速行擒獲阿逆輒領
兵回至伊犁奏請籌辦伊犁窮困人等此時糧餉
牲隻未經運赴因降旨令此等貧民自赴巴里坤
領給將來陸續踵至人數衆多所有牛羊籽種茶

麩等項俱須多方購備其料理彈壓關係頗重非
和起豆斌等所能籌畫著傳諭黃廷桂一面將糧
石速行撥運一面前赴巴里坤經理其厄魯特等
前來就領者酌量給與口糧三四月或給與籽種
即令回本處耕種並將伊等因受阿逆荼毒是以
格外加恩之處明白宣示倘稍有滋事即將為首
不法之人嚴加懲治其或恃衆不法即相機勦滅
便宜行事黃廷桂酌量情形妥協辦理再前經降

旨令該督拏解薩喇爾若在巴里坤拏解現在達
什達瓦部落人衆駐劄彼處不免驚疑且慮薩喇
爾或畏罪脫逃著前赴嘉峪關一帶迎候薩喇爾
俟其到日即行拏解事竣再赴巴里坤籌辦一切
事宜

定西將軍策楞等疏奏解送賊黨額林沁來京
策楞等奏言據散秩大臣吞圖布解賊黨額林
沁至軍營臣等公同訊問據稱我為阿睦爾撒

納挾制同行不得已勉強服從後接到將軍等
諭令擒賊贖罪之文因力弱不能擒獻今大兵
已到情願歸誠等語查額林沁自去年由哈薩
克前來即蒙

恩優加體卹乃並未至軍營中途即同阿逆背叛今
力窮被執飾詞乞降且伊孫策伯克扎卜現已
逃避應將額林沁解赴京師治罪仍派兵擒拏
策伯克扎卜奏入報

聞

己亥

訓諭定西將軍策楞等

上諭大學士曰策楞等誤報阿睦爾撒納就擒一事不加詳審遽爾飛章入告固可駭異然此實由克勒特宰桑誤聽巴顏得木齊之子俄羅斯所傳輾轉馳報一如得之目覩遂孟浪騰布其咎尚屬可原及既知所報屬虛而大兵將抵伊犁與叛賊相

距甚近若彼時疾馳倍進振作軍聲亦何難掩獲
乃策楞扎拉豐阿並不身先督率而以追捕專委
之玉保令其前驅玉保又僅令烏爾登尼瑪追至
庫隴癸嶺獲一額林沁而返遂若足以塞責阿逆
轉得飄然遠颺竄入哈薩克界內在叛賊詭計多
端而諸臣一無調度朕早料其必致奔軼屢經降
旨訓責而道遠往返亦已無及天下事原難豫定
使諸臣果竭盡智勇而或致失之意外則亦無可

如何即當驚竄已遠而窮力以追則亦自盡人事
乃漫不經心彼此玩誤是叛賊之遁迹遠引實意
中之事而非意外之事矣若謂馬力疲乏則叛賊
之馬何獨不疲乏耶即如多果魯特之伊勒都齊
和碩齊等係在我大兵之後又何以轉能尋蹤前
往耶更可異者玉保兵過伊犁不遠並不見賊僅
據逃兵之言謂賊已窮蹙即馳札策楞達爾黨阿
等以為叛賊困窮無煩大軍深入而策楞等亦遂

不權輕重遽爾返旆以安輯伊犁為詞不知伊犁
乃久經撫定之地有何可辦况經阿逆蹂躪之後
所存者饑羸殘弱將軍一至不過環向乞食而已
國家撫御中外固不惜加恩惠養然此等蠢吏賊
至即從賊去來歸迥非內地赤子可比乃不以擒
賊為事而沾沾為殘衆謀其室家豈不謬耶策楞
前經獲罪至一聞阿逆逃竄稍知奮勉即速前進
朕加恩授為將軍重任伊當竭力圖報乃不審機

宜緩急措置失當若此總之用兵準噶爾原非朕
本意蓋以無集事之人也然其始也策凌策凌烏
巴什等欵闖內附不得不為之經理游牧以為久
長計而

兩朝未竟之緒機有可乘於事勢又有不容坐失者初
非窮兵黷武啟邊釁而勤遠略也迨大軍所至未
折一矢諸部爭迎伊犁悉定此可見

上蒼之默佑有不期然而然者至於阿逆負恩竄匿忍

心怙亂人所切齒然不過一逃囚耳與此事大局全無闕礙譬如獵場中走一狼脫一兔但以衆人分路捕搜竟至竄逸豈不可笑可恨哈薩克前經通使及奉朕勅諭情甚歡欣恭順阿逆即求托跡其反覆詭詐伎倆人所共知豈肯容納是尚不能及從前羅卜藏丹津之投準噶爾現已傳諭哈薩克令其協力擒獻自可計日授首惟在事諸臣之辦理未善節節錯誤則殊出情理之外朕於用兵

之初所以遲回未決者原慮諸臣非任事才乃今
天心垂相如此而諸臣行事不惟不能仰承竟往往相
左果不出朕所慮甚為愧懣所有策楞扎拉豐阿
玉保本身之罪俟叛賊就擒後再酌量分別另降
諭旨將此通行宣諭中外知之又

諭曰阿逆乘間逃竄皆由策楞等偃然自廢坐失機
宜即以擒獲額林沁一事而言伊等既已誘致額
林沁伊所屬人內曾有肆為妄言者即當擒拏辦

理取其牲隻以壯我兵力乘機即速往追乃輾轉
遲疑貽誤時日坐視阿逆漏網其本意原不急急
以追擒阿逆為事也朕已降旨明白指示策楞接
到此旨可即遣玉保恩克博羅特先行隨令達爾
黨阿領兵繼進策楞等亦隨達爾黨阿之後帶兵
聲援倘仍復如前中止伊等之罪亦可自知無庸
朕多降諭旨再玉保曾行文策楞停其前往似伊
一人即可任擒賊之事惟恐策楞與之分功何以

竟致奔竄著傳諭詰問玉保再福昭策卜登等已
回伊等呈報擒賊時既稱得之克勒特宰桑亦宜
究問俄羅斯等因何妄報及係何人指使之處一
一具奏

命叅贊大臣兆惠來京

上諭軍機大臣曰前命兆惠赴巴里坤辦事後仍會
同策楞領兵前進今擒拏阿逆一事已令玉保達
爾黨阿等帶兵向哈薩克索取現在伊犁無事策

楞所辦事宜全無成竹兆惠至巴里坤辦竣事務
即速來京將伊犁及軍營情形詳細奏聞候朕面
授方略再往軍營

庚子

諭陝甘總督黃廷桂安西駐兵事宜

上諭軍機大臣曰黃廷桂奏安西添設滿兵因餉項
不敷不能遽照原議五千之數請先發三千名前
往等語前因分駐邊防滿洲兵丁較為有益是以

令黃廷桂酌量裁汰各營冗兵於安西地方安設
滿營今既稱各項裁汰節省餉銀尚在不敷正不
必拘五千之數即酌撥三千名未始不可此時著
先撥二千名前往俟一二年後再行辦理

命安插達什達瓦部衆於阿爾台地方

上諭軍機大臣曰達什達瓦之妻現已病故著公明
瑞馳驛前往率同侍讀學士富森土默特台吉喇
嘛扎卜等奠醑茶酒並加恩賞銀二百兩經理喪

事其所屬人衆著編為三旗移住阿爾台地方交與舒明阿蘭泰等善為經理散秩大臣鄂齊爾布林托里俱著授為總管其宰桑鼐瑪克察罕庫本們都巴雅爾博羅呼爾哈阿爾該默濟格等俱著授為副總管其應補授叅領佐領及編設旗分事宜一并妥協辦理具奏請旨所有達什達瓦之弟伯格里屬人亦著鄂齊爾等管轄達什達瓦之妻止有一女著給與郡王青滾雜卜為妻並賞銀三

百兩

辛丑

申諭定西將軍策楞等

上諭軍機大臣曰覽策楞今日所奏並未將如何擒賊及遣人前往哈薩克之處籌及其意以為既至伊犁大事已畢不知伊犁地方久經平定伊等到彼與否原無關係惟當設法擒拏逆賊為要務况阿逆原意料大兵不能驟至初無防備及逃竄之

意使策楞當時即行奮力直前則逆賊自必就縛
何能奔逸其奈伊等之遷延不前何且伊等從前
摺內尚有遣人前赴哈薩克之說今乃並無一言
惟將逃人所訴阿逆逸出時帶往哈薩克阿布賚
之弟岳勒博羅斯并留於準噶爾之俄羅斯使人
頗羅和爾一同前去之語敷衍具奏其意若謂阿
逆既將哈薩克及俄羅斯之人帶去其勢若不見
容於哈薩克必將投赴俄羅斯索取既難便可中

止不知逆賊所之不論何地必當前往擒捕斷無
中止之理而策楞等輒有難色是誠何心著傳諭
策楞等仍遵昨日所降諭旨辦理一面將遣赴哈
薩克之人及玉保等何日起程之處速行奏聞

命定西將軍策楞安插新降台吉宰桑等

上諭軍機大臣曰現在軍營內新來投誠之台吉宰
桑等甚多此等人須細加體察如厄爾錫音哈薩
克錫喇等受恩甚深自無異志至大兵將抵伊犁

始行來歸之索薩賚等原係阿逆黨羽因勢窮乞
降尚屬可疑伊等身在軍營首鼠兩端潛通消息
俱未可定著傳諭策楞領兵至哈薩克時不必將
伊等帶往即移至額林哈畢爾噶及附近巴里坤
一帶安插方為妥協伊等受阿逆騷擾生計艱窘
設法遷移俾不至於窮困並將此曉諭厄爾錫音
等自必益加奮勉易於集事

定西將軍策楞等疏奏拏獲賊黨克什木等

策楞等奏言賊黨克什木洪郭什俄羅斯等因
阿睦爾撒納搶掠喇嘛各自逃散臣等派哈薩
克錫喇前往俱行緝獲現在派員解送京師奏
入報

間

命封內大臣厄爾錐音哈薩克錫喇公爵

上諭軍機大臣曰此次追拏阿逆內大臣厄爾錐音
哈薩克錫喇俱屬奮勉現在逆酋未獲本非論功

之時但伊等係新降之人應加恩以示鼓勵厄爾
錐音由朱爾都斯進兵向各鄂拓克集兵四千餘
名奮勇協力哈薩克錫喇曾擒察袞父子今復將
賊黨克什木等擒獲俱能感激朕恩實心効力甚
可嘉予厄爾錐音哈薩克錫喇俱著加恩封授公
爵至吞圖布管解賊黨明噶特舍楞等至軍營時
中途遇見伊母相聚賊人乘間脫逃吞圖布係特
授為圖什墨勒辦事之人乃至疎縱賊黨本應治

罪第因母子相見偶爾踈忽致令賊人奔竄尚非
出於有心著從寬免其治罪前已令玉保帶同恩
克博羅特前往哈薩克吞圖布亦著同往以贖前
愆

命賞給員外郎唐喀祿副都統職銜赴北路軍營辦
事

上諭軍機大臣曰北路哈達哈軍營內辦事乏人員
外郎唐喀祿尚諳蒙古事務著賞給副都統職銜

授為領隊大臣隨同哈達哈辦事

壬寅

命噶爾藏多爾濟等各歸游牧

上諭軍機大臣曰策楞等前經調取噶爾藏多爾濟前赴伊犁今逆賊已竄伊犁無庸前往噶爾藏多

爾濟等游牧俱有應辦事宜且令伊等得以休息即各處台吉宰桑等邇來俱宣力行走其各鄂拓克人等應照舊管轄及時耕種以資生計俱著回

至各游牧毋庸隨將軍等前進俟有用伊等兵力
之處再行調取至二十一鄂拓克已授圖什墨勒
管轄即著厄爾錐音等善為安撫毋使失所亦不
得滋生事端方為妥協此次台吉諾爾布尚屬出
力伯什阿噶什亦並未從逆應加恩封賞策楞等
即會同厄爾錐音等將應如何加恩之處奏聞請
旨至阿玉錫擒拏克什木甚屬奮勉伊為賊人戕
害著擇其子弟一人補授收楞額並加恩賞給藍

翎永遠食俸

命賞索倫察哈爾喀爾喀官兵

上諭軍機大臣曰此次索倫察哈爾喀爾喀官兵其屬奮勇著查明分別等第加恩賞賚一等官員著賞俸半年兵丁著賞錢糧兩月二等官員著賞俸三個月兵丁著賞錢糧一月其厄魯特人等雖不如索倫察哈爾喀等出力亦著查其著有勞績者每人各賞銀三兩至坐臺之察哈爾厄魯特喀爾喀

等俱著賞錢糧一月以示獎勵

訓飭叅贊大臣玉保等

上諭軍機大臣曰據玉保等奏稱多果魯特之伊勒都齊等俱隨阿逆潛逃又扎薩克薩喇爾至厄爾錐音處搶奪物件經扎那噶爾布拏獲等語薩喇爾原係阿逆黨羽今又肆行搶掠久之必且從賊著即行正法諾海奇齊克係與薩喇爾同來投誠之人亦應留心防範扎那噶爾布殊屬可嘉即著

將薩喇爾戶口牲隻賞給至伊勒都齊等挈其游牧尚能追及阿逆與之同逃則可知前此玉保等追緝不力之罪百喙難辭伊等尚欲諉卸於厄魯特等殊屬無恥不知尼瑪亦不過因其熟識道路令其前往至擒拏逆賊豈可專委於一二新降之人望其奮勉出力乎朕於此事實不勝憤懣此次若仍前退怯必將玉保等從重治罪

甲辰

諭陝甘總督黃廷桂解運軍營馬匹及赴巴里坤查
辦事宜

上諭軍機大臣曰黃廷桂奏准軍營咨文停解馬匹
一摺此事皆由策楞辦理乖謬現在擒拏阿逆全
資馬力且時值夏令草已茂長正可就近牧放以
資調遣著傳諭黃廷桂即將應解馬匹仍行解送
一面知會達爾黨阿等無為浮言所惑至厄魯特
窮人甚多前已有旨令赴巴里坤自運口糧此等

人不能保無偷竊攘奪之事黃廷桂即遵前旨親往鎮撫量為賞給令其回巢耕種倘有滋事之徒即行懲治其現在肅州應辦事務著吳達善辦理

丙午

申諭定西將軍策楞辦理事宜

上諭軍機大臣曰策楞等奏稱據哈薩克錫喇告稱伊犁地方窮困不能取辦兵丁口糧請移駐空吉斯地方等語伊犁地本荒僻原非駐兵要地且經

阿逆騷擾之後情形更屬不堪但現在大兵在彼
原為擒拏逆賊並非久駐之計策楞等既知難以
駐兵即應籌畫前進速擒逆賊乃僅以一奏了事
意謂如此便可作撤兵之計是伊等全不以擒賊
為事一味畏難退縮深可痛恨又如遣使哈薩克
一事哈薩克錫喇尼瑪等俱不令遣宰桑前往僅
請派一二得木齊奴楞額等看來伊等俱不免有
推諉之意前降旨令玉保帶領恩克博羅特吞圖

布等傳諭索取伊等倘不能奮往從事不必令其
先行著達爾黨阿領兵前往玉保帶領伊等隨後
繼進務期擒獻毋負委任至厄爾錐音由朱爾都
斯進兵拏獲察哈什掠其戶口牲隻察哈什係附
從阿逆之人應行辦理著即將所獲戶口牲隻賞
給厄爾錐音至其收取諾爾布敦多克屬人一事
殊屬非是諾爾布敦多克係同薩喇爾前至吐魯
番誠之人何以將伊屬人收取且厄爾錐音現辦

圖什墨勒事務諸事俱應秉公始可服衆著策楞
傳諭厄爾錫音令將此項人等即行給還伊果實
心効力將來自當從重施恩

命加恩輝特部落人衆

上諭軍機大臣曰據納穆扎爾奏稱輝特部落人數
甚衆現在生計稍艱等語輝特人等俱能安分謀
生皆策卜登多爾濟普爾普等善於管轄所致第
因人數過多生計不能充裕著加恩賞給口糧三

個月以示體卹再據策卜登多爾濟等告稱伊族
中台吉巴朗巴桑策林明安鄂爾準瑪木特等五
人原係舊時台吉從前因與阿逆不和未經呈報
今應請旨加恩等語巴朗等原係台吉乃為阿逆
朦混未報今策卜登多爾濟據實報出甚屬可嘉
著即將巴朗等戶口若干查明給與或應授為扎
薩克及何等台吉之處納穆扎爾奏聞請旨

命左都御史何國宗會同統統勲考驗西域山川道

里

上諭軍機大臣曰何國宗奉差前往伊犁測量晷度
繪畫地圖現由巴理坤一帶及額林哈畢爾噶等
處辦理約需半年至冬間冰雪凝寒著仍回至巴
里坤居住俟明春再往辦理並著劉統勳會同前
往將該處山川道里詳悉考驗纂錄進呈

定西將軍策楞等奏請補授吞圖布為布庫努
特宰桑

策楞等奏言臣等前奉

諭旨查明布庫努特人等戶口多寡數目再行請

旨授吞圖布為布庫努特宰桑今查布庫努特人等

共計千戶已敷一鄂拓克之數應請交與吞圖

布管轄即授吞圖布為布庫努特宰桑奏入報

聞

丁未

諭侍郎舒明等稽察卡倫事宜

上諭軍機大臣曰舒明阿蘭泰等駐劄布延圖應將
各處卡倫嚴行稽察即如賞扎薩克圖汗之阿睦
爾撒納屬人烏勒木濟潛至訥默庫游牧給與馬
匹令其逃竄此必由卡倫經過何以全無覺察此
際若已緝獲即著在彼處正法嗣後如有此等逃
人一經拏獲即照此辦理並將卡倫侍衛等查叅
至都爾伯特游牧事務已令巴蘭泰前往經理舒
明現住布延圖仍著兼管

平定準噶爾方略正編卷二十六

欽定四庫全書

平定準噶爾方略正編卷二十七

乾隆二十一年夏四月戊申

命授巴罕烏魯特宰桑托克托博羅特為散秩大臣
上諭軍機大臣曰據策楞奏稱巴罕烏魯特宰桑托
克托博羅特留養去歲被掠之喀爾喀王齊巴克
雅喇木丕勒協理台吉多爾濟現在護送前來等
語托克托博羅特著加恩授為散秩大臣齊巴克

雅喇木丕勒多爾濟即遵前旨遣回喀爾喀游牧
定西將軍策楞等疏奏額林沁病故

策楞等奏言臣等派侍衛古爾格勒圖僧保等
押解額林沁赴京據報行至托里地方額林沁
病故臣等即遣員驗看屬實查額林沁係阿逆
黨羽應行正法今雖病故仍戮屍示衆奏入報

聞

已酉

訓飭定西將軍策楞等

上諭軍機大臣曰前據玉保奏稱阿逆由庫隴癸嶺
逃入哈薩克境內伊回至固勒扎商同策楞等或
領兵前進或遣使索取等語而策楞等隨後奏事
數次總未籌及作何擒拏逆賊之處雖有遣瑚集
圖前往哈薩克之語究竟前往與否亦未奏明伊
等現在作何籌畫彼此不相照應前後又復矛盾
深可痛恨已節次降旨訓示今玉保又奏及拏獲

賊黨明噶特舍楞等遣人解赴軍營因策楞未與相見乘間脫逃其意以明噶特等脫逃係策楞疎忽所致與伊無涉此等不過附和逆賊之人無關緊要原可不必深究乃玉保輒為此奏則是與策楞等顯有抵牾情狀伊等不知和衷共濟協力擒拏首惡各懷意見形諸奏牘實為深負朕恩看此情形必不能望伊等奮勉出力殊不知逆賊無論竄往何處必當窮搜極捕明正典刑以彰國憲策

楞玉保等能自知罪愆痛改前非尚可加恩寬宥
倘仍各挾私見貽悞大事朕亦任其自取毋庸多

諭

辛亥

命布圖庫等補授多果魯特等九鄂拓克宰桑

上諭軍機大臣曰策楞等將多果魯特等九鄂拓克

宰桑應行補授兼管之處奏聞請旨所有綽和爾

宰桑已降旨將恩克博羅特補授其多果魯特宰

桑員缺著布圖庫補授鄂畢特宰桑員缺著訥默
庫補授額爾克騰宰桑員缺著內大臣尼瑪暫行
兼管伊克巴爾達穆特宰桑員缺著賽音章吉圖
補授並令圖布慎協同管理巴罕巴爾達穆特宰
桑員缺著索諾木車林補授巴爾達穆特宰桑員
缺著塔斯補授庫圖齋訥爾宰桑二缺著賽齋拉
呼諾爾布補授

壬子

命叅贊大臣達爾黨阿帶兵前赴哈薩克

上諭軍機大臣曰策楞等領兵擒拏阿逆事事舛謬全無籌畫今西路則專任達爾黨阿北路則專任哈達哈伊二人尚屬勇往著即領兵前赴哈薩克務期擒獻現據兆惠奏稱特訥格爾安濟哈雅共有兵丁二千餘名巴里坤可用馬匹亦有二千等語著將特訥格爾等處兵丁俱交與達爾黨阿帶領並著和起等即將馬匹解赴應用迅速奏功哈

寧阿鄂實俱著在叅贊大臣上行走

諭定西將軍策楞等籌辦伯什阿噶什事宜

上諭軍機大臣曰前據策楞等奏稱伯什阿噶什然將游牧移至博羅塔拉地方此係傳聞之言策楞等並未將親見伯什阿噶什之處奏聞今又於來京入覲人員內列入伯什阿噶什之名策楞等此時果與伊相見自可無疑如尚係傳言則所稱移至博羅塔拉之語不可全信豈有遷至博羅塔拉

道由伊犁伊不親身來見者此時伊若游移觀望
不即向博羅塔拉遷移猶依附哈薩克邊界則係
明為接應阿逆暗中聯絡不可不詳加體察果有
此情策楞等即將伯什阿噶什擒拏辦理倘實無
從逆情形亦即行奏聞

命封台吉諾爾布等公爵

上諭軍機大臣曰策楞等奏台吉諾爾布等隨同大
兵効力甚屬奮勉等語諾爾布布庫察罕昆都斯

車克爾等俱著加恩封授公爵烏巴什特古斯哈
什哈額林沁扎卜貝克博爾巴里巴桑等俱著授為
扎薩克台吉鄂畢特宰桑丹津上年同達瓦齊來
京身故已將伊子訥默庫補授宰桑並著加恩投
為散秩大臣再據奏額爾克騰得木齊格存現領
三千餘戶額爾克騰宰桑事務已令尼瑪兼管格
存應作何加恩著策楞等議奏請旨其額爾克騰
舊宰桑俄羅斯現在何處一併奏聞

癸丑

命大學士忠勇公傅恒前往西路整飭軍務

上諭大學士曰現在西路軍營策楞王保等辦理諸事乖張錯誤種種不合機宜無以宣威荒服著大學士忠勇公傅恒馳驛即赴額林哈畢爾噶一帶整理軍務令衆台吉等齊集會盟事竣即速回京命授公明瑞副都統銜前往西路軍營隨同達爾黨阿辦事

命孛解定西將軍策楞等

上諭軍機大臣曰朕因策楞等所辦事宜種種乖謬是以命大學士公傅恒前往整飭軍務策楞玉保著孛解來京治罪策楞之子特通額著革職交達爾黨阿軍前効力扎拉豐阿身為副將軍一籌莫展本應一體治罪姑念伊未經更事且係蒙古著革去郡王加恩給貝子品級來京候旨並諭厄爾錐音喀薩克錫喇吞圖布恩克博羅特等今因將

軍大臣辦事錯謬革職拏問伊等生長準噶爾地方熟悉厄魯特哈薩克情形理應奮勉効力乃遣使哈薩克一事並不實心商辦彼此推諉伊等俱不能無罪但念新降之人姑從寬免嗣後如能感恩圖報奮力贖罪仍當加以厚恩倘少存退諉亦不姑貸

定西將軍策楞等疏奏招撫波羅泥都霍集占等事宜

策楞等奏言據回人總管阿底斯侍衛岳蘇卜
阿卜都喇伊木等稟稱去年入

覲時因伊犁地方擾亂求移至吐魯番地方業經轉
奏今波羅泥都霍集占等已將回人并我等妻
子俱行伊往查波羅泥都霍集占等向與葉爾
羌喀什噶爾積有仇隙未必前往彼處必至庫
車賽里木積木薩一帶居住若遣使同往招撫
自必投誠移至吐魯番等語臣等與哈薩克錫

喇等公議回人素受準噶爾役使今既舍伊犁而去必不願回應即派員同阿底斯等前往曉諭招撫令伊等遷至吐魯番居住奏入報

聞

甲寅

諭定邊左副將軍哈達哈等辦理烏梁海事宜

上諭軍機大臣曰朕因西路領兵大臣策楞等辦理乖謬特命大學士公傅恒前往經里并拏問策楞

等治罪其北路專任哈達哈等協力擒拏阿逆迅
奏虜功今日哈達哈等奏到辦理烏梁海一摺尚
未合宜烏梁海等反覆無常全不可信現在有逃
竄情形明係豫聞風聲欲隨阿逆遁去必須速行
勦滅哈達哈勿少遲疑即行辦理收其牲隻以益
兵力方足以示懲儆倘阿逆煽同哈薩克威脅烏
梁海等潛為構釁因而搶掠察達克等游牧則並
舊日收服之烏梁海皆為搖動不若早為殄滅庶

可以杜後患再伊等現已進兵二千名尚餘兵若干哈達哈即同青滾雜卜迅速前往現在牧草發生務多帶領兵丁二三千名陸續進發以壯軍威著哈達哈等一面辦理一面即速行奏聞

命叅贊大臣富德來京

上諭軍機大臣曰叅贊大臣富德領兵擒拏唐古忒甚屬奮勉量此時已經擒獲即或竄逸亦非阿逆可比毋庸再為追逐富德著即來京面聆諭旨再

往軍營

命散秩大臣達什敦多卜住居察哈爾

上諭軍機大臣曰據哈達哈奏散秩大臣達什敦多

卜上年隨將軍等駐劄伊犁伊游牧內屢次被賊

搶掠今攜其妻孥懇請移至察哈爾附伊族人同

居等語著照所請達什敦多卜准其移至察哈爾

居住

丙辰

命宣示薩喇爾罪狀

上諭軍機大臣曰黃廷桂已遵旨拏解薩喇爾又奏稱達什達瓦人衆現住巴里坤已令兆惠等密為防範其拏解薩喇爾之事勿使洩漏等語薩喇爾獲罪拏解達什達瓦人衆不能保其一無聽聞伊所稱勿令宰桑等聞知一語乃詭詞要挾正伊狡獪自取罪戾也此事必當明白宣示諭以薩喇爾獲罪情節俾知罪在薩喇爾與伊等部衆無涉自

不致別生事端前已令兆惠轉諭薩喇爾之兄布
林兆惠如已來京即著黃廷桂到彼曉諭令伊等
照舊安輯部衆赴所指阿爾台等處游牧勿使驚
懼若如黃廷桂所奏令其遠徙他處則示怯生疑
何以申國憲而整軍律在未經拏解之前不可不
密拏解後則當宣播罪狀使衆共知令其畏服著
傳諭黃廷桂知之

丁巳

叅贊大臣富德疏奏追襲賊黨唐古忒情形

富德奏言臣追逐賊黨唐古忒屢次擊敗賊衆
由薩勒巴爾圖等處遁去臣等即由烏隆古河
前往堵截至察罕鄂博地方忽遇哈薩克兵一
千名與唐古忒合隊大兵奮勇衝擊斬首百餘
級擒獲賊黨二人詢知阿睦爾撒納於正月內
遣人令伊等前來搶掠烏梁海塔本集賽等游
牧臣等即將被掠之集賽噶勒雜特三十餘戶

奪獲就近交與達什策凌都噶爾等收回共計連
戰十餘次陣亡兵丁三十名其奮勉官員兵丁
查明另奏奏入報

聞

命大學士忠勇公傅恆回京

上諭大學士曰策楞等統兵追捕逆賊阿睦爾撒納
既已直抵伊犁相距甚近乃不振我軍威疾馳前
進以擒賊為事一接王保札致即回駐伊犁而王

保雖追至庫隴癸嶺僅獲一額林沁而返其額林沁屬下之人仍皆相隨叛賊以去由此觀之若使策楞玉保等早能奮勇協力急行追捕則叛賊斷不致遠颺即玉保當額林沁就縛時更能取其屬下馬駝以濟我師行之用竭力窮追尚亦不難掩獲即使失之意外其所擒戮必不止一老邁之額林沁而已也此何等重務而乃輾轉延緩坐失事機前已明降諭旨宣示中外矣夫以叛賊伏處近

地尚且交臂失之今已竄入哈薩克境內其去已遠即遣使傳諭哈薩克其縛獻與否舉未可知是應懾以兵威曉以大義而先遴選勇敢將弁將命以往或庶幾耳而策楞等奏稱恐哈薩克羈留我使致開釁端欲遣哈薩克之俘留於厄魯特者令其前往如此措置豈不褻朝命而貽笑於諸厄魯特耶庸懦之人將有以策楞等為曉事不知事在人為今未遣一人未發一兵是所謂自畫自棄耳

即以國家經費言之雍正年間兩路用兵費帑至七千萬今未至二千萬也而府藏充盈較前轉多且朕並未因用兵加征賦稅尅減兵餉而賑卹更較往時為過優何至策楞等為國惜費耶此不過以惟怯思家之心託為忠良為國之言耳如是則人誰不能國家何賴有是臣乎是以特命大學士忠勇公傅恒馳驛前往將伊等拏問治罪並至額林哈畢爾噶一帶令衆台吉等齊集會盟以宣布

威信整飭軍務茲以傅恒起程後二日據策楞等奏稱奉到朕三月初七日訓飭之旨已自知罪戾畏懼惶恐即日率領官兵調集各台吉人馬直壓哈薩克邊境勒令擒獻如叛賊逃往布魯特即至布魯特索取等語是伊等既已厲兵深入比傅恒到軍營時策楞等進兵已一月有餘斷無復行追還之理所欲會盟之台吉宰桑等任事之人又俱隨往軍前正在用兵之際亦未便齊集會盟大學

士傅恒亦毋庸前赴即回京贊理機務策楞等軍前現有達爾黨阿同往一切機宜自應商酌而行或因有此一番懲儆策楞等知所奮勉叛賊得就擒亦未可定此亦視伊二人之福命矣即如馬匹一項現奏稱就各鄂拓克湊集二千五百餘匹則前此亦並非無馬直以畏怯不欲辦理耳近據富德奏到追殺叛賊唐古特至塞伯蘇台地方遇哈薩克一千餘衆我軍以索倫兵三百餘直前衝

突悉皆潰散斬三百餘級所護軍械牲隻甚多此
亦可見哈薩克本非勁旅策楞等畏怯自悞是以
望而却步耳總之叛賊之逸實由於策楞玉保二
人既已誤之於前罪無可逭今知畏罪思欲奮勉
姑留一綫予以自贖之路視此番効力如何再降
諭旨朕用人行政不存絲毫成見如伊等果能擒
賊奏功尚可相抵但恐伊等初念迫於畏懼轉念
又復游移後力不能自振則朕雖曲加寬宥亦不

能也將此通行宣諭知之

戊午

命停派厄魯特兵丁隨往

上諭軍機大臣曰策楞等奏稱行文於附近鄂拓克
宰桑等令其派出兵丁從征等語現在厄魯特生
計甚艱人亦不能奮勉効力派往從征於事無益
兵貴銳而不貴多所有索倫察哈爾兵丁現足調
遣不必更派厄魯特兵丁前往其現在投誠之台

吉宰桑等自必懇求入覲伊等出兵効力殊屬勞苦宜暫為休息以示體卹俟拏獲阿逆後再行降旨令伊等前來入覲

命諾爾布之子達瓦藏布承襲公爵

上諭軍機大臣曰諾爾布現在病故著加恩將伊子達瓦藏布承襲公爵從前隨同阿逆之賓巴因係諾爾布之婿懇請帶往游牧今達瓦藏布尚在幼年賓巴斷不宜留於彼處著扎拉豐阿等拏赴軍

營正法

己未

命陝甘總督黃廷桂回駐肅州

上諭軍機大臣曰前曾降旨令厄魯特部落人衆就食巴里坤原因伊犁人等生計艱困不便聽其聚處滋事耳今已傳諭策楞等就其部落設法資助則不必遠赴巴里坤且伊犁人衆四處分散已屬無幾策楞等現在進兵亦無暇籌辦此事黃廷桂

不必久駐巴里坤應仍回至肅州督辦調撥軍需
事務

庚申

授總兵李繩武為安西提督駐劄巴里坤

上諭大學士曰豆斌現在患病著解任調理安西提

督員缺著李繩武補授即赴巴里坤會同和起等

辦理糧餉事務

辛酉

諭防範哈薩克事宜

上諭軍機大臣曰阿逆現竄入哈薩克境內西路命
達爾黨阿北路命哈達哈等各領兵索取阿逆或
逞其狡謀詐言哈薩克縛賊擒獻引兵深入設伏
以待皆不可不豫為防備達爾黨阿等領兵前往
即哈薩克有擒獻之言亦仍宜擁兵自衛多方防
範毋冒昧以墮奸計方為妥協現在富德追襲唐
古特等所遇哈薩克兵丁係受阿逆慫恿搶掠塔

本集賽噶勒雜特等游牧在阿逆之意無非欲使
哈薩克有得罪天朝之名而伊因得潛竄彼處以
為藏身之固是以特降諭旨曉諭哈薩克阿布齊
令其擒獻逆賊不特將搶掠塔本集賽等事概免
究問尚當加以厚恩並將富德等所獲哈薩克屬
人二名即行遣回達爾黨阿等接到諭旨即先遣
幹員同伊屬人前往詳悉傳諭仍帶兵速行進發
責令擒獻

命傳

諭左部哈薩克

上諭左部哈薩克阿布賚曰逆賊阿睦爾撒納勢窮力竭竄入爾哈薩克境內又煽惑爾屬人等搶掠塔本集賽噶勒雜特等游牧誘令爾等獲罪天朝伊得以棲身爾境苟延殘喘今爾部邊境人等誤信其言私相劫掠遇大兵擊敗擒獲爾屬人呼岱巴爾氏額塞爾拜二人解送來京詢問知爾固不

知情也應即將此二人正法念爾部落向屬恭順
不過屬人誤聽阿逆之言是以格外加恩將爾屬
人釋放遣回並齎賞內緞四疋從前侍衛順德訥
奏稱爾欲受天朝厚恩遣使進貢後使人為阿逆
所留未經入覲朕已早鑒爾誠悃此次接到諭旨
即將阿逆擒獻不特搶掠塔本集賽等事概免究
問仍當加以厚恩現遣兩路將軍等領兵萬人將
抵爾境爾等倘墮賊計迷而不悟不即擒獻則必

更發大兵盡行勦滅爾其熟審利害毋貽後悔

癸亥

命曉諭準噶爾部衆

上諭準噶爾部衆曰前因將軍策楞等疎縱逆賊遷延觀望而辦理一切事宜諸多未協是以特命大學士忠勇公傅恒前往軍營與爾各部落台吉宰桑等齊集會盟整飭軍務即如策楞等派爾等各鄂拓克兵丁隨營出征朕念爾等屢遭兵革生計

艱難特降旨令歸各游牧休息耕種其軍營支用爾等馬匹牲隻並令給予價值以示體卹今策楞等自知前愆業已領兵前進爾台吉宰桑等亦有効力行間者不便更因會盟之事久候時日現已停止大學士公傅恒前往用須諭旨詳悉曉諭爾準噶爾地方連年不靖互相劫奪各部落生計自不能饒裕然能及時播種牧養牲隻以務本業則一二年間元氣自可全復若徒以搶奪為事則有

業之戶一被搶奪即成貧乏甚至從而效尤盜賊
日熾勢將何所底至因思有無相卹貧富相通即
爾部落中原自有可以通融籌辦之道果能收養
貧民使其耕作自給則衆人皆可不致失所久之
自成善俗爾台吉宰桑等務期約束所屬禁止劫
奪辛勤力作互相調卹副朕子愛羣黎之意至於
衣服制度不妨仍其舊俗若因歸順天朝必盡用
內地服色勢亦有所難行爾等習慣自然一時豈

能驟易且將舊時衣服盡行棄置亦殊非愛惜物
力之道即朕所頒賜物件亦止宜善為收貯傳之
子孫惟來京朝覲暫時服用現在喀爾喀蒙古王
公及居住青海之厄魯特等平日各居游牧止仍
其舊惟來京及赴圍場扈從時始易服色爾等俱
可做照而行朕令爾各部落等編立旗分設官授
爵其制即與爾部設立宰桑得木齊收楞額之意
大略相同從前爾等不知妄生疑懼或謂難以奉

行爾等應再行明白曉諭使之各奉約束勿滋事
端方可永享昇平之福爾台吉宰桑等皆受朕厚
恩惟仰體朕一視同仁之意善為撫綏庶幾所屬
人等皆知守分安居休養生息朕實有厚望焉

命諾爾布敦多克之子巴雅爾拉虎承襲公爵

上諭軍機大臣曰策楞奏稱諾爾布敦多克及伊子
達瓦俱已病故深堪悼惜著賞銀二百兩料理喪
事其公爵即著伊幼子巴雅爾拉虎承襲伊游牧

與哈薩克接壤如欲遷移至額林哈畢爾噶等處
悉聽其自便巴雅爾拉虎尚在幼年並著於哈薩
克錫喇尼瑪內酌派一員代為管轄

乙丑

命劉統勳馳驛回京

上諭軍機大臣曰前降旨令劉統勳回至巴里坤協
同何國宗辦理西域輿圖此時應已抵巴里坤輿
圖事務仍交與何國宗專辦劉統勳著即馳驛來

京

丙寅

命定西將軍策楞遣人曉諭回人波羅泥都等

上諭軍機大臣曰策楞等奏稱回人波羅泥都霍集

占等兩次遣人至軍營俱未得達今又遣厄魯特

策勒伯探聽大兵抵伊犁信息欲來投誠等語波

羅泥都等屢次遣人探信如投誠之意屬實策楞

等應即派兵前往曉諭伊等果親至軍營即准其

歸降其如何安插納貢之處奏聞請旨

命納噶查之弟巴爾濟承襲公爵

上諭軍機大臣曰納噶查之弟達克巴前經加恩令其承襲公爵現在又已病故其公爵著納噶查幼弟巴爾濟承襲

丁卯

訓飭定西將軍策楞等

上諭軍機大臣曰據策楞等奏稱玉保領兵前赴察

罕烏蘇追尋阿逆踪跡達爾黨阿等由博羅塔拉
進發俟至勒卜西特勒木哈達處會齊一同前赴
哈薩克又策楞等因籌辦官兵馬匹口糧暫駐於
登努勒台博羅布爾噶蘇等處以為聲援至應赴
博羅塔拉時即行前往等語觀此可知此次仍是
玉保一人領兵前赴哈薩克而策楞等並未繼進
夫策楞扎拉豐阿身為將軍不親自前往反令玉
保獨行是誠何心豈將軍之去反不如玉保之去

為有益耶況玉保原係需人提調指揮之人伊得意則進失意則退策楞等諒所深悉豈以玉保擒獲逆賊則專屬玉保一人之功設令無功獲罪策楞等身為將軍又可脫然事外耶策楞等寧不計及此而冒昧妄行朕實為之不解伊等摺內有仍懇朕慈鑒之語試問以如此行事尚欲邀朕憐憫豈但知乞朕加恩竟不自忖作何承受耶總之伊等前奏欲赴哈薩克之意特因朕嚴旨催促迫於

不得不然姑勉強從事及稍加溫諭即自延緩不
前殊不知朕所矜憫者乃行間兵弁及哈薩克錫
喇尼瑪等新來歸附之人此際殊覺勞苦耳豈謂
策楞等受任將帥不能奮身前進至於數數債事
轉得邀恩耶策楞等身膺重任理應勇往直前有
進無退乃必待朕降旨督促方圖前進否即退縮
不前曾不思道路遙遠軍中事宜若必待朕一一
指示而後奉行詎能望其成事即如官兵口糧一

事當向巴里坤領取不應向厄魯特湊辦去歲用兵時準噶爾人衆尚未困弊原可因糧於敵且大兵不久即還亦非久駐而永常懵然不知必斤斤以計日授糧為辭朕是以斥其非而加之罪今歲進兵則諸部落當阿逆擾亂之後事勢與前大異不但派往哈薩克之兵當以接濟口糧為要即駐伊犁等處兵丁亦當由內地運給口糧豈可轉向厄魯特等湊辦在將軍惟當迅速進兵至所需口

糧何難向巴里坤領取即令不能尅期全到且先
趕運兒馬騾馬其羊隻隨後運送有何不可而策
楞並不籌辦前後奏摺亦無一言及此豈不重堪
駭怪乎且準噶爾人衆俱我臣僕伊等生計艱難
尤當施恩賞賚何至索及伊等牲隻策楞等如此
湊辦牲畜派撥各鄂拓克兵丁全不知事體輕重
尤屬悖謬不堪又此次派往哈薩克之兵自可就
現有之兵酌量調度毋庸更為徵派如富德帶兵

三百即能擊敗哈薩克一千之衆伊等獨未之見乎我兵抵哈薩克時彼若即行縛獻阿逆則已否則量我兵力或可急進或應徐圖總在相度機宜隨時辦理何可豫存拘牽之見策楞等並不審量事勢而率意乖舛若此朕實不勝詫異再覽伊等所奏並未言及伯什阿噶什現在何處從前伊與阿逆頂佛結盟同惡有素此時保無私相糾合阻撓我師尤宜先事防範著達爾黨阿細加偵訪如

伯什阿噶什已向內地遷移並無他故自可毋庸
辦理倘有別情即先將伯什阿噶什擒拏取其姓
隻助我兵力然後前赴哈薩克庶可剪除阿逆羽
翼使無他患今擒拏阿逆之事業經屢降諭旨責
成達爾黨阿當善體朕意奮勉出力速圖奏功若
策楞等或去或不去及伊等尚肯救過贖罪與否
並聽伊等自行揣度為之朕亦毋庸多諭

五月戊辰朔

命革玉保參贊大臣仍在領隊大臣効力行走授達爾黨阿為定邊右副將軍巴祿為贊參大臣

上諭軍機大臣曰據玉保奏伊並未行文策楞令其停止進兵一摺此語更屬悖謬試思伊即並未阻止策楞而逆賊阿睦爾撒納究竟脫於誰手伊等如果協力同心彼此不相推諉何以貽誤至此即如拏獲額林沁一事伊屬人既有抗拒情形即應奮力勦捕收其馬匹乘勢追擒則阿逆必不至於

漏網及遣使哈薩克又復如此畏憚游移玉保獨
不與聞其事乎再前奏阿逆脫逃時兵力無多今
則突稱帶往二千人種種自相矛盾明係有心欺
飾若仍令叅贊軍務必至掣肘債事著將玉保革
去叅贊大臣仍在領隊大臣上行走以供驅策此
次若能奮勉尚可寬宥倘稍有退縮必重治其罪
達爾黨阿近日辦事甚屬勇往著授為定邊右副
將軍巴祿現往軍前辦事著授為叅贊大臣

命駐劄巴理坤辦事大臣和起來京

上諭軍機大臣曰和起在巴里坤辦事甚屬黽勉著
馳驛來京面聆訓示再往軍營同兆惠籌辦一切
事宜其巴里坤事務著侍郎雅爾哈善暫行前往

管理

已已

諭辦理遷移輝特部落人等游牧事宜

上諭軍機大臣曰準噶爾地方年來屢遭蹂躪未經

安輯朕前已降旨令策卜登多爾濟普爾普等俟
明年遷至原游牧處庶於生計有裨今據納穆扎
爾奏伊等今歲請在鄂爾昆額爾得尼招等處游
牧俟牲畜孳息再行遷移著即照所請行至納噶
查之弟烏勒木濟等求往青海居住事屬可行但
伊等原係久居準噶爾地方之人水土素所服習
若移至青海轉恐無益從前納噶查曾經奏請朕
已降旨曉諭烏勒木濟等著仍遵前旨明年同策

卜登多爾濟普爾普等遷回原游牧居住

命曉諭都爾伯特各部落禁止盜竊

上諭軍機大臣曰都爾伯特人等與扎哈沁等彼此盜竊牲畜案犯累累皆由準噶爾連年擾亂以致劫奪成風恬不知怪抑知伊等生計全賴牲畜似此盜竊相尋牲畜不獲蕃孳生計焉能充裕亟須嚴行禁止著傳諭納穆扎爾舒明阿蘭泰巴蘭泰等通行曉諭都爾伯特輝特扎哈沁沙畢納爾人

等務各嚴禁所屬毋得盜竊滋事務期守分各圖
生業副朕休養羣生至意

庚午

命寬叅贊大臣富德降革罰俸各案

上諭軍機大臣曰叅贊大臣富德此次追襲唐古忒
雖未孥獲中途將哈薩克人等擊敗殊屬奮勉若
加恩將富德所有罰俸降級革職留任之案概行
寬免

逆黨察噶什庫克等正法

軍機大臣奏言臣等審訊察噶什附和阿逆謀
叛阿逆將約蘇圖殺戮後即令察噶什管理綽
和爾宰桑事務始終黨同附惡應請

旨將察噶什凌遲處死其唐古忒僕人庫克亦應處
斬奏入報

聞

辛未

命定西將軍策楞等確探阿逆逃竄地方

上諭軍機大臣曰詢問富德解到哈薩克呼岱巴爾
氏等告稱阿逆逃竄若由阿勒坦額默勒庫隴癸
嶺經過沙喇孽勒地方可至右部哈薩克境內等
語沙喇孽勒地方即係伯什阿噶什所居伊向與
阿逆交結今尚未見投誠或與阿逆同投右部哈
薩克亦未可定著達爾黨阿玉保確探阿逆逃竄
去向追踪緝拏若伯什阿噶什與阿逆會合則先

掠其游牧以增兵力前已降旨令策楞等籌辦伊等身任將帥並不慮及必待朕之指示不知伊等所辦更有何事即伊等緝賊之不力於此益見且哈薩克錫喇尼瑪等皆熟諳情形之人阿逆向何處逃竄亦應詢問伊等辦理朕閱策楞等止奏遣人往哈薩克阿布賚處而不及比里坤斯伊等又何以知阿逆逃往哈薩克左部必不逃入右部境內耶並著傳諭策楞等與哈薩克錫喇尼瑪等悉

心籌畫迅速追擒另有諭旨曉諭右部哈薩克著
侍衛布袞馳驛齎往

命傳

諭右部哈薩克

上諭右部哈薩克阿比里斯曰阿睦爾撒納生性好
詐為爾等所稔悉今者背恩逃竄滋擾厄魯特各
部落朕命將軍等領兵擒拏伊力窮計感又逃入
爾哈薩克境內此特因準噶爾地方不獲棲身以

爾部乃邊遠之人不深悉其罪狀易於欺妄暫求
依託或乘間煽惑爾等擄掠厄魯特等游牧藉此
生釁使爾部有獲罪天朝之咎不便將伊擒獻以
為苟延旦夕之計爾等中伊詭謀或現將伊存留
容隱亦未可定是以特行降旨曉諭速將逆賊擒
獻軍營朕必重加恩賞並令爾部落照舊安居勿
令騷擾現在大兵兩路進發不過萬餘如爾等甘
為賊用執迷不悟朕必興師十萬盡行勦滅爾等

其熟計利害仰承恩典毋貽後悔

命喀爾喀貝勒車木楚克扎布暫回游牧

上諭軍機大臣曰據和起等奏准策楞咨現在撤回
喀爾喀貝勒車木楚克扎布公旺布多爾濟等令
往巴里坤聽候調遣等語車木楚克扎布等如已
調遣進兵即令其前進若尚未起程著和起等降
旨曉諭伊等自去歲在軍前行走往返勞頓今不
過捕一逃犯毋庸多派人員且策楞等早已率兵

前進伊等前往亦屬無及車木楚克扎布旺布多爾濟俱著帶兵各回游牧以示優卹

壬申

命諭定西將軍策楞等

上諭軍機大臣曰策楞等雖自知不能實力追擒阿逆之罪而現在辦理亦不合機宜從前伊等奏阿逆逃竄帶兵甚少今復欲多選兵丁再行前進且派撥厄魯特兵丁更向各鄂拓克等支取口糧殊

不知索倫察哈爾兵丁儘足調遣若厄魯特兵丁
乘勝則進遇敵則退不能奮往出力何庸多派至
向伊等支取口糧更屬不合伊等若不將巴里坤
運送口糧飛檄停止此時早已運到何致如此周
章此皆策楞等從前冒昧所致再伊等奏請存留
伊犁兵五百名甚屬無謂若將此兵帶往追擒阿
逆豈不甚善今反欲將此存留伊犁不過為保護
伊等一身起見與軍務何益又稱帶兵回至登努

勒台地方等語朕從前令伊等在登努勒台收放馬匹相機進止特因伊等先令王保前行哨探尚在未議進兵是以令其暫住陸續繼進今既已進發豈有將已進之兵復行撤回之理種種拘泥辦理甚屬謬妄此旨到日策楞等即速行前往毋得退縮怯懦仍蹈前轍

諭定邊右副將軍達爾黨阿等辦理古爾班和卓事宜

上諭軍機大臣曰據策楞等奏古爾班和卓係哈薩克仇敵去年即行投誠亦無附和阿逆之事等語此奏甚屬錯誤古爾班和卓不特上年並未投降且班第等前經奏稱伊因擒獲達瓦齊曾為阿睦爾撒納稱慶則此時與阿逆同行亦未可定著傳諭達爾黨阿玉保大兵前進古爾班和卓若將伊游牧內移前來謁見則可准其投降否則用兵將伊擒拏解送京師並收取其牲畜以佐大兵進剿

之用

臣等謹案大兵平定伊犁遠近諸部懷仰

恩威輸誠恐後間有一二怙終附逆首鼠兩端者無不自罹法網以速滅亡若古爾班和卓前此詐稱歸命潛懷狡謀一時軍營大臣等尚不能洞其情偽為之奏請我

皇上坐照如神無幽不燭於乞降之始核其踪跡已自包藏異心是以


密授方略俾知悉心防範厥後古爾班和卓猶託詞
移往阿爾台垂間竄入烏梁海與阿逆狼狽
交通屢肆奸宄將軍等幸得稟承

廟算一殲之於西路復遇北路大兵全行剪滅於此
知么麼伎倆無一能逃

聖明照察而當軍書旁午時遙揣情形於數萬里之
外

睿慮周詳若持左券又豈僅昔人所稱虜在目中者

所能髣髴萬一也哉



平定準噶方略正編卷二十七